

जम्मू-कश्मीर नै एम्स विजयपुर परिसर च अपना पैहला जेन-ज़ेड डॉकघर खोलियै इक महत्वपूर्ण उपलब्धि हासल कीती ऐ। एह गें सरकारी परिसरें च स्थापित डॉकघरें गी आधुनिक बनाने दे डॉक विभाग दे जतनें दा इक हिस्सा ऐ ते इस अभियान दा मकसद

रिवायती डॉक सेवाएं गी नौजवानें दे मुजब ते तकनीकी समर्थ केन्द्रें च तब्दील करना ऐ। जेनरेशन-जेड आस्तै तयार कीता गेदा डॉकघर इक आधुनिक माहौल- डिजिटल भुगतान विकल्प ते सखखली सेवां प्रदान करदा ऐ। एह इक गै थाहरै पर डॉक- बैंकिंग ते बीमा सेवाएं दी सांझी पहुंच बी प्रदान करदा ऐ- जेहदे कन्नै विद्यार्थियें ते कर्मचारियें लेई एह मता सुविधाजनक होई जंदा ऐ।



Jk Govt APR

जम्मू-कश्मीर सरकार नै अपने सारे कर्मचारिये गी इस बारे दे सालना संपत्ति विवरण गी ऑनलाइन संपत्ति विवरण प्रणाली पोर्टल पर तय समे-सीमा दे अन्दर-अन्दर लाजमी तौर पर दर्ज करने दा निर्देश दिता ऐ। वैध कारणे वगैर संपत्ति विवरण पेश नेई करने पर भ्रष्टाचार निवारण अधिनियम तैहत दंड लाया जाग। इसी आपराधिक दुराचार मनोआ जाई सकदा ऐ। एह रिटर्न पी.आर.एस पोर्टल www.prs.jk.gov दे राएं ऑनलाइन दाखिल कीता जाई सकदा ऐ। कर्मचारी 1 सोयां 31 जनवरी 2026 तक अपना विवरण जमा कराई सकदे न।



Health NITI Aayog

जम्मू-कश्मीर च नीति आयोग दे सैहयोग कन्नै व्यापक सुधार सरबन्धी खाका तयार करने आस्तै सेहत सेवाएं दा बड़ा विस्तार तौले गै दिक्खने गी लब्बोग। जम्मू च नीति आयोग दे सदस्य डाक्टर वी.के. पॉल हुंदे कन्नै लग्गी दी इक उच्ची सतह दी बैठक दौरान इस

योजना पर चर्चा कीती गई। इस योजना का मकसद समूलचे केन्द्र शासित प्रदेश चरणनीतिक हस्तक्षेप- तकनीकी एकीकरण ते समर्थ निर्माण दे राएं सेहत सेवाएं गी निम्गर करना ऐ। डॉ- पॉल होरें समें-सिर योजना गी लागू करने लेई पूरे समर्थन दा भरोसा दोआया। इस मौके पर मौजूद मुख सचिव अटल डूल्हू होरें सीनियर फैकल्टी गी बरकरार रखने ते दूर-दरेडे ते सरहदी इलाके च विशेष सेहत सेवाएं दा विस्तार करने दी जरूरतें पर बी जोर पाया।

<><><><><><>

Div. Com NH

जम्मू दे डिवीजनल कमीशनर रमेश कुमार होरें खिते च राष्ट्री जरनैली सिड़कें आली बड्डी परियोजनाएं दे कम्मै च हासल प्रगति दा जायजा लैता ऐ। एकड़ी परियोजनाएं च दिल्ली-अमृतसर-कटड़ा एक्सप्रेस-वे- जम्मू -पुंछ राष्ट्री जरनैली सिड़क ते NHAI- NHIDCL ते BRO आसेया तोढ़ चाढ़े जा'रदे होरनें महत्वपूर्ण सिड़कें सरबन्धी कम्म शामिल न। उनें भगवती नगर आले फ्लाई-ओवर दे कम्म गी तौले सबूरा करने ते जम्मू-पुंछ जरनैली सिड़कें पर गधरवन सुरंग दियें दौने ट्यूबें गी खोलने दे निर्देश जारी कीते। बैठक दरान परियोजनाएं लेई जिमीं हासल करने ते जंगलात मैहकमे दियां मंजूरियां हासल करने सरबन्धी मामलें पर बी टकोहदी चर्चा कीती गई।

<><><><><><>

Weather

मौसम विभाग केन्द्र नै अज्ज समूलचे जम्मू-कश्मीर च बदल छाए दे रौहने दी पेशगोई कीती ऐ। उच्ची थारें आहले इलाकें च खासतौरा पर 20 जां 21 दिसम्बर गी हौली थमां दरम्यानें दर्जे दी बर्फबारी होने दी संभावना जताई गई ऐ। कुपवाड़ा- बांडीपोरा ते गांदरबल दे किश हिस्सें च 21 दिसम्बर गी दरम्याने शा भारी बर्फबारी होई सकदी ऐ। इस दौरान मदानी इलाकें च हौली बरखा पौने दी बी मेद ऐ। यात्रियें ते ट्रांसपोर्टरें गी सलाह दिती जंदी ऐ जे ओह सौगे-सतर्क रौहन ते ट्रैफिक पुलिस ते प्रशासनिक दिशा-निर्देशों दी पालमा करन।



HC Winter Vocations

जम्मू-कश्मीर ते लद्दाख हाई-कोर्ट नै 2026 लेई अपनी स्याले आली छुट्टियें दी अधिकारिकि तौर पर घोषणा करी दिती ऐ। आकाशवाणी दे जम्मू संवाददाता दी रिपोर्ट मुजब इस अधिसूचना च एह दस्सेया गया ऐ जे हाई-कोर्ट च पैहली जनवरी थमां 24 जनवरी 2026 तगर स्याले दियां छुट्टियां होंगन। एहदे च इब्बी दस्सेया गया ऐ जे पैहली थमां 10 जनवरी तगर हाई-कोर्ट च कोई कम्मकाज नैई होग ते इस अवधि गी “No Work Period” घोषत कीता गया ऐ। हुकमै मुजब- मुख न्यांधीश होर छुट्टियें आली इस अवधि दे दुरान महत्वपूर्ण मामलें दी सुनवाई करने लेई जजें गी नामज़द करगंन।

